



MENGURANGKAN JENAYAH

**MENJADIKAN MALAYSIA
NEGARA YANG LEBIH SELAMAT**



YAB DATO' SERI DR. AHMAD ZAHID HAMIDI

Timbalan Perdana Menteri dan Menteri Dalam Negeri

Sejak pelaksanaan NKRA Mengurangkan Jenayah, kita telah meningkatkan usaha untuk mengurangkan jenayah secara keseluruhan. Inisiatif kita, seiring dengan komitmen dan dedikasi agensi-agensi di bawah Kementerian Dalam Negeri, telah menampakkan banyak kejayaan, sepertimana yang dibuktikan dengan penurunan jenayah indeks yang ketara sebanyak 53% dari tahun 2010 hingga 2017.

Untuk mendapatkan gambaran yang tepat mengenai kadar jenayah di peringkat akar umbi, Polis Diraja Malaysia pada tahun 2017 telah memulakan pengiraan baharu, iaitu parameter antarabangsa bagi pengiraan jenayah indeks. Dengan kaedah baharu ini, jenayah indeks dikira bagi setiap 100,000 penduduk; dengan itu, kita mengambil kira peningkatan populasi. Pada penghujung tahun 2017, kita telah merekodkan kadar jenayah indeks 306.15 bagi setiap 100,000 penduduk berbanding dengan kadar asas, iaitu 352.07 bagi setiap 100,000 penduduk yang telah ditetapkan pada tahun 2016.

Sejajar dengan itu, Polis Diraja Malaysia turut menggunakan Penunjuk Persepsi Jenayah (Perception of Crime Indicator, PCI) untuk menangani dan mengukur keberkesanan usaha pencegahan jenayah. Pada tahun 2017, kita telah mencatat pengurangan sebanyak 39.8% dalam persepsi rasa takut orang awam terhadap kemungkinan menjadi mangsa jenayah di Kuala Lumpur, Selangor, Pulau Pinang dan Johor.

Menyedari bahawa jenayah mesti dibanteras dari akar umbi, kita telah mengambil pendekatan yang lebih holistik dari aspek pemulihan dan integrasi semula banduan untuk mengurangkan kadar penjenayah berulang, sekali gus mengurangkan kadar kemungkinan jenayah. Justeru, kita akan terus meningkatkan kemahiran banduan agar mereka mempunyai peluang yang lebih cerah untuk kembali ke pangkuan masyarakat selepas dibebaskan,

dan mengkaji semula pendekatan terhadap jenayah dadah. Untuk memastikan kadar jenayah terus terkawal, inisiatif baharu seperti program Kepolisan Moden dan peningkatan keselamatan sempadan turut dilaksanakan.

Dalam usaha membanteras jenayah, saya ingin merakamkan terima kasih kepada Polis Diraja Malaysia dan rakyat yang semakin aktif terlibat dalam kepolisan komuniti dan pihak berkepentingan NKRA yang lain seperti Jabatan Penjara Malaysia dan Agensi Anti Dadah Kebangsaan atas prestasi yang cemerlang. 2017 menjadi tahun contoh bagi NKRA ini, namun demi memastikan kemajuan dapat terus dikekalkan, kita harus sentiasa berjaga-jaga. Dengan ini, saya menyeru pihak media agar memainkan peranan yang lebih besar dalam usaha memerangi jenayah dan menyebarkan maklumat mencegah jenayah. Liputan media turut membantu memupuk kepercayaan rakyat melalui penyampaian keberkesanan pasukan keselamatan dan cara untuk rakyat turut mengambil bahagian. Ini amat penting untuk mengawal rasa takut terhadap jenayah dalam kalangan rakyat.

Melangkah ke hadapan, kita akan terus bekerjasama dengan pelbagai agensi dalam sistem keadilan jenayah, kerajaan tempatan dan persekutuan selain sektor swasta untuk mendorong mereka agar memainkan peranan yang lebih aktif dalam membanteras jenayah. Di samping kepolisan komuniti oleh rakyat, usaha-usaha tersebut akan mewujudkan masa depan yang lebih selamat untuk semua.

MENGURANGKAN KEJADIAN JENAYAH DAN MENGEKALKAN TANGGAPAN POSITIF

Polis Diraja Malaysia (PDRM) sentiasa berusaha untuk mengurangkan kadar jenayah indeks tahun demi tahun. Sejak pelancaran NTP, kerajaan telah mencatat pengurangan daripada 486 jenayah dilaporkan setiap hari pada tahun 2010 kepada 307 pada tahun 2016. Pada tahun 2017, purata bilangan jenayah yang dilaporkan setiap hari ialah 272, menunjukkan pengurangan berterusan kejadian jenayah. Jenayah indeks di Malaysia merangkumi 13 jenis jenayah yang berlaku dengan kerap dan secara umum yang menggambarkan keseluruhan landskap jenayah di Malaysia. Jenayah ini dibahagikan kepada kecurian harta benda (kecurian kereta, motosikal, van, lori dan jentera berat, jenayah ragut, serta pecah rumah) dan jenayah ganas (bunuh, rogol, rompakan bersenjata, rompakan tanpa senjata, serangan menggunakan senjata, serangan dan rompakan tanpa senjata).

“Bilangan kes jenayah yang dilaporkan setiap hari menurun dari 486 pada tahun 2010 kepada 307 pada tahun 2016.”

Pada tahun 2017, PDRM telah meminda pengukuran jenayah indeks daripada purata jenayah yang dilaporkan setiap hari kepada insiden jenayah bagi setiap 100,000 penduduk, sejajar dengan piawaian Pejabat Pertubuhan Bangsa-bangsa Bersatu Mengenai Dadah dan Jenayah (United Nations Office on Drugs and Crime, UNODC). Kaedah pengukuran ini mencerminkan kadar jenayah indeks dengan lebih tepat, kerana ia mengambil kira rekod jenayah bagi saiz populasi tertentu. Kaedah baharu ini membolehkan Malaysia membandingkan statistik jenayah dengan negara-negara lain di dunia, khususnya dengan negara ahli UNODC yang lain. Berdasarkan kepada Global Peace Index 2017 yang dikeluarkan oleh Institute for Economics and Peace, Malaysia berada di kedudukan 29 daripada 163 negara. Jumlah 352.07 kejadian jenayah bagi setiap 100,000 penduduk yang dicatat pada tahun 2016 kini digunakan sebagai nilai kaedah asas bagi pengukuran pada masa akan datang. Pada penghujung tahun 2017, kadar jenayah di seluruh negara dicatat pada 306.15 bagi setiap 100,000 penduduk, iaitu penurunan sebanyak 13% daripada tahun 2016.

Demi memastikan penambahbaikan Penunjuk Persepsi Jenayah (PCI) yang berterusan, PDRM akan terus meyakinkan rakyat bahawa keselamatan dalam negara adalah terkawal dan keselamatan awam merupakan keutamaan pasukan polis. Susulan pelancaran tinjauan PCI di Kuala Lumpur pada tahun 2016, tinjauan pada tahun 2017 diperluas lagi ke tiga negeri, iaitu Selangor, Pulau Pinang dan Johor untuk memperoleh lebih banyak data tentang persepsi rakyat terhadap jenayah di negeri-negeri lain di Malaysia. Hasil pelaksanaan inisiatif yang melangkaui NKRA ini, PCI telah mencatat pengurangan daripada 61% pada tahun 2016 ke 37% pada tahun 2017, dengan Kuala Lumpur mencatat bacaan PCI sebanyak 42%, Pulau Pinang sebanyak 33%, Johor sebanyak 35% dan Selangor sebanyak 37%.

TRANSFORMASI KEPOLISAN UNTUK PERKHIDMATAN YANG LEBIH BAIK KEPADA RAKYAT

Program Kepolisan Moden yang dilancarkan oleh PDRM pada tahun 2015 telah menyumbang kepada kemajuan dalam membanteras kegiatan jenayah dan meningkatkan persepsi orang awam terhadap jenayah. Program ini mengubah kepolisan tradisional kepada kaedah yang berorientasikan perkhidmatan dan mesra pelanggan, melalui penekanan terhadap teknologi dan kecekapan dengan memperkemas dan mempermudah proses dan amalan kerja yang lama. Selain itu, program ini bertujuan meningkatkan keyakinan rakyat terhadap keselamatan dan keamanan dengan pengerahan lebih ramai anggota polis di lapangan dan penambahbaikan proses pemfailan laporan polis.

Antara inisiatif di bawah program Kepolisan Moden ialah:

- Pembangunan semula sistem pelaporan polis dipermudah (sPRS);
- Pelaksanaan sistem penilaian pelanggan di balai polis di bawah Ibu Pejabat Polis Kontinjen Kuala Lumpur (IPK KL);
- Pewujudan sistem semakan dalam talian (<https://sso.rmp.gov.my>) yang telah menambah baik proses siasatan dengan memudahkan pelaporan status siasatan pada setiap tahap;
- Pelaksanaan penuh Terminal Data Mudah Alih (Mobile Data Terminal, MDT), iaitu komputer mudah alih yang dipasang pada kenderaan peronda yang disambungkan kepada sistem PDRM untuk membolehkan anggota polis melakukan pemeriksaan individu tertentu terus di lokasi;



- Mewujudkan dan melaksanakan sistem i-Quarters untuk memantau pembahagian dan penempatan kuarters bagi anggota polis; dan
- Penggunaan tablet mudah alih untuk membuat laporan polis di lokasi jenayah, sekali gus menggantikan amalan tradisi, iaitu menulis laporan jenayah secara manual dalam buku log Laporan Khas dan buku log Laporan Kecemasan menurut Seksyen 107 Kanun Prosedur Jenayah.

Pada masa ini, inisiatif Kepolisan Moden dilaksanakan secara rintis di dua balai polis di Kuala Lumpur, iaitu balai polis Taman Tun Dr. Ismail dan Pantai. Balai polis ini telah melaksanakan kesemua inisiatif Kepolisan Moden dengan sejumlah 360 pegawai polis. Melangkah ke hadapan, program ini akan dilaksanakan di semua 24 balai di bawah IPK KL menjelang tahun 2018 melibatkan 11,500 pegawai polis, atau kira-kira 10% daripada anggota polis di lapangan.

Jabatan Siasatan dan Penguatkuasaan Trafik (JSPT) PDRM juga terus mengendalikan kesalahan trafik secara tegas dengan mengeluarkan saman POL 257 kepada pesalah trafik di lokasi apabila kesalahan dikesan. Sehingga Disember 2017, PDRM telah mengeluarkan 1,941,799 saman POL 257, dan 803,561 daripadanya telah

berjaya dikutip. Pada tahun 2018, PDRM menyasarkan kutipan saman yang lebih tinggi, iaitu sekurang-kurangnya 42% berbanding dengan 40% pada tahun 2017. Penguatkuasaan kutipan saman adalah penting kerana ia merupakan hukuman kepada pesalah selain mendidik mereka mengenai akibat kesilapan mereka dan mencegah kesalahan trafik.

Sehubungan itu, PDRM telah melaksanakan beberapa langkah untuk memudahkan pembayaran saman seperti saluran dalam talian melalui MyEG Services, pembayaran menggunakan kad melalui mesin teler automatik (ATM) Maybank, pelbagai sistem pembayaran dalam talian menggunakan komputer (COPS), kaunter trafik yang terdapat di pusat beli-belah selain ibu pejabat kontinjen dan daerah serta kaunter Jabatan Pengangkutan Jalan terpilih.

PDRM telah menetapkan hala tuju strategik dan pelan tindakan bagi inisiatif Kepolisan Moden untuk mencapai standard penguatkuasaan undang-undang bertaraf dunia menjelang tahun 2020. Selepas penyempurnaan fasa dua inisiatif ini pada tahun 2017, PDRM akan menumpukan pelaksanaan di seluruh pasukan polis di Kuala Lumpur untuk memastikan langkah keselamatan yang menyeluruh disediakan untuk rakyat.



Pelancaran sistem e-Reporting di balai polis Taman Tun Dr. Ismail pada 10 Mac 2017.

Peluang Baharu untuk Para Banduan

Khairul Zakran dan M.K. Manogaran merupakan dua individu yang berjaya hasil daripada program peningkatan kemahiran banduan. Program tersebut telah memberi nafas baharu dalam kehidupan mereka. Khairul yang menghabiskan sebahagian besar zaman mudanya dalam penjara amat menyanjungi program ini kerana program ini telah memberikannya peluang untuk memulakan kehidupan yang baharu. Mengikut beliau, “Saat anda melangkah masuk ke penjara, segala baik buruk yang anda pernah lakukan perlu ditinggalkan. Pangkat, pencapaian dan dendam sudah tidak bermakna lagi.” Beliau menghabiskan masanya di dalam penjara membina disiplin, mendalami kerohanian dan mengasah kemahiran interpersonal.

Antara aktiviti yang ditawarkan di bawah program peningkatan kemahiran ini termasuklah membuat kuih-muih, mengukir kayu, menjahit serta membuat songket dan batik. Pada beberapa bulan pertama di dalam penjara, Manogaran melibatkan diri dalam aktiviti-aktiviti seperti pembungkusan paip dan pemotongan rumput. Namun begitu, program yang memberi impak yang paling besar terhadapnya adalah apabila terpilih untuk menjalani kursus memandu yang dijalankan dengan kerjasama Metro Driving Academy (Metro).

“Syarat kemasukannya tidak terlalu ketat,” kata Manogaran, “Bagus, kerana kami pun tidaklah mempunyai kelayakan yang tinggi.” Antara latihan yang diberikan oleh Metro termasuk cara-cara untuk mengendalikan pelbagai jenis kenderaan termasuk motosikal, kereta, serta kenderaan-kenderaan berat seperti lori dan bas.

PKP (Penolong Komisioner Penjara) Haji Wan Ramzan Wan Ahmad menyatakan bahawa objektif program peningkatan kemahiran banduan ini adalah untuk

mewujudkan haluan untuk para banduan memulakan kehidupan baru apabila dibebaskan kelak. Menurut beliau lagi, kebanyakan banduan adalah dari segmen B40 dan pihak Jabatan cuba untuk memberikan mereka peluang untuk keluar daripada segmen tersebut. “Ramai daripada mereka berjaya meraih pendapatan melebihi RM2,500 melalui pekerjaan yang mereka perolehi dengan adanya pensijilan daripada Metro,” tambah beliau.

Antara sebab Khairul dan Manogaran mampu menjalani latihan enam bulan tersebut adalah kerana adanya layanan baik dari pihak Metro. “Latihan yang kami terima bukan sahaja tentang cara-cara membaiki tingkap dan enjin kenderaan. Kami juga belajar tentang sisi jasmani kami – bagaimana jam biologi tubuh manusia berfungsi, mengapa cuaca panas memberi kesan terhadap pemandu jarak jauh dan sebagainya. Program ini menghasilkan graduan yang amat bagus kerana kami tahu alternatif untuk kekal segar, dan kami faham tentang kepentingan keselamatan penumpang dan kargo,” kata Manogaran.

Khairul menekankan bagaimana masa di dalam penjara memberi peluang untuk para banduan berfikir dan melakukan perkara-perkara yang mereka tidak berkesempatan sebelum ini. Oleh itu, setiap program peningkatan kemahiran yang beliau jalani bukan sahaja mengasah kemahiran teknikalnya, tetapi juga kemahiran insaniah. “Orang selalu bertanggung banduan tidak dibenarkan berkomunikasi di dalam penjara, tetapi realitinya, kami masih lagi menjalani kehidupan seperti manusia biasa.”

Apabila memohon kerja lepas keluar penjara, tanggapan ini jugalah yang membina stigma bahawa bekas banduan akan terus dibayangi kesilapan yang menyebabkan mereka dimasukkan ke dalam penjara.

“Unit vokasional Jabatan Penjara sedang merumus kaedah baharu untuk membantu banduan apabila mereka dibebaskan daripada penjara,” kata Haji Wan Ramzan. “Terdahulu, program latihan lebih banyak memberikan fokus kepada kemahiran semata-mata, tetapi program latihan terkini lebih menyeluruh dan memberi fokus dalam mencipta haluan kerjaya untuk para peserta. Sejak 2007, kami telah melatih 13,000 orang banduan.”

Khairul dan Manogaran mengakui bahawa mereka lebih mudah untuk mendapat pekerjaan dengan pensijilan yang mereka peroleh semasa di dalam penjara. Di akhir setiap program peningkatan kemahiran, para peserta diberikan Sijil Kemahiran Malaysia. Pensijilan ini memberikan mereka kelebihan dalam bidang yang mereka pilih. Sebagai contoh, kebanyakan pemandu di Malaysia tidak



Penjara Kajang, Selangor.



mempunyai pensijilan lain selain daripada lesen kenderaan. Maka, pensijilan SKM memberikan mereka suatu kelebihan berbanding calon-calon lain.

Mereka berdua telah lama meninggalkan penjara dan berjaya membina kerjaya masing-masing. Khairul yang bermula sebagai seorang kerani di Akademi Memandu Metro kini bekerja dalam bidang keselamatan persendirian dan terlibat dalam pelbagai program kemasyarakatan. Beliau juga membina platform untuk membantu individu yang ingin meningkatkan kemahiran. Manogaran pula bermula sebagai seorang pemandu di Metro dan kini telah dinaikkan pangkat kepada Ketua Pemandu.

Meskipun program ini membawa banyak kebaikan, namun terdapat juga pelbagai cabaran dan rintangan dalam pelaksanaannya. “Sokongan penuh daripada pihak Kerajaan, terutamanya dari segi dana, amat penting dalam pelaksanaan program-program latihan ini,” kata Haji Wan Ramzan. “Dana diperlukan untuk membawa masuk pelatih profesional dan membina infrastruktur.”

Perkara yang paling menyedihkan adalah sikap rakyat Malaysia terhadap bekas banduan. Manogaran dan Khairul berkata, seringkali rakan-rakan dan keluarga tidak memberikan sokongan kepada bekas banduan. “Punca utamanya adalah tanggapan mereka terhadap kami,” kata Khairul, “Saya keluar daripada penjara dengan maruah, tapi apa yang meruntuhkan semangat saya adalah apabila orang memulaukan saya.”

Masyarakat kita perlu mengubah mentaliti dan menghapuskan pandangan serong terhadap bekas banduan. Mereka sepatutnya membantu bekas banduan menyesuaikan diri semula dengan masyarakat. “Setiap orang tidak pernah impikan untuk masuk penjara, dan masyarakat memainkan peranan yang penting dalam mengurangkan kadar residivisme,” ujar Haji Wan Ramzan. “Penjara mampu mengubah seseorang,” kata Manogaran. “Saya berharap agar lebih ramai orang mampu menerima kami dalam dunia pekerjaan. Berikan kami peluang untuk membuktikan diri kami.”



Khairul Zakran (kiri) dan M.K Manogaran (kanan), peserta program peningkatan kemahiran banduan.

MELIBATKAN ORANG AWAM DALAM KEPERLUAN KESELAMATAN

Dalam usaha untuk lebih memahami kebimbangan orang awam berhubung dengan jenayah dan keselamatan, Kerajaan telah membangunkan Indeks Penglibatan Komuniti (Community Engagement Index, CEI). CEI bertujuan untuk menstrukturkan semula dan menyelaras cara PDRM berinteraksi dengan rakyat dan usaha ini diukur berdasarkan tiga kriteria: peratusan penglibatan (rondaan); keamatan penglibatan (tempoh interaksi); dan keberkesanan penglibatan (penghargaan).



Ketua Polis Negara, Tan Sri Dato' Sri Mohamad Fuzi Harun melihat dengan lebih dekat aset terbaru milik PDRM motosikal Kawasaki scrambler model KLX 250.

Inisiatif ini merangkumi dua platform penglibatan komuniti, iaitu program 'Talk to Us' di Kuala Lumpur dan juga Hari Bertemu Pelanggan yang telah dilancarkan di 13 negeri. Dua platform ini, khususnya program 'Talk to Us', diadakan untuk mendapatkan maklum balas daripada orang awam tentang cara polis boleh menambah baik prestasi demi meningkatkan rasa selamat dalam kalangan orang awam. Antara maklum balas yang diterima daripada orang ramai termasuklah supaya polis meronda kawasan tertentu dengan lebih kerap pada waktu malam selain meningkatkan keramahan dan keterbukaan anggota polis. Program ini sejajar dengan moto PDRM, "Polis dan Masyarakat Berpisah Tiada". Pada tahun 2017 sahaja, PDRM telah mengadakan 1,687 program penglibatan di seluruh negara.

MENERAPKAN PENDEKATAN MENYELURUH UNTUK MEMBANTERAS PENYALAHGUNAAN DADAH

Ketagihan dadah kekal menjadi kebimbangan utama di negara ini dan Kerajaan terus gigih berusaha untuk membasmi masalah sosial ini. Pada tahun 2017, polis menemui 18 makmal pemprosesan dadah dan menahan 73 anggota sindiket dadah. Dadah yang bernilai kira-kira RM198.54 juta turut dirampas semasa serbuan polis.

Di bawah NTP, Kerajaan telah melaksanakan pendekatan baharu dalam program rawatan dan pemulihan dadah untuk memerangi ketagihan. Diketuai oleh Agensi Antidadah Kebangsaan (AADK), langkah-langkah berikut merupakan antara usaha yang telah dilaksanakan untuk menangani masalah ini:

- Penubuhan pusat pemulihan dadah (PUSPEN) untuk mengenal pasti dan mengasingkan penagih dadah mengikut jenis ketagihan dan keperluan rawatan mereka. NGO digalakkan untuk memperluas operasi dengan mengendalikan PUSPEN terpilih atau rumah pertengahan, sekali gus membolehkan mereka memanfaatkan pengalaman profesional mereka dan menghasilkan kadar pemulihan yang lebih tinggi kepada lebih ramai penagih dadah;
- Menaik taraf dua Pusat Pemulihan & Penjagaan (Cure & Care Centre, CCSC) yang dahulunya dikenali sebagai Pusat Pemulihan Penagihan Dadah, kepada Klinik Mini Pemulihan & Penjagaan 1Malaysia (Mini C&C) di kawasan hitam; dan
- Meminda Akta Penagih Dadah 1983 untuk menjadikan ketidakpatuhan suatu kesalahan boleh tangkap untuk mengurangkan masa yang diambil bagi menangkap Orang Kena Pengawasan (OKP) yang tidak patuh kerana waran tidak lagi diperlukan.

Inisiatif membanteras penyalahgunaan dadah harus menjadi usaha bersama antara Kerajaan dengan komuniti. Justeru, Program Pernerdayaan Komuniti (Community Empowerment Programme, CEP) berusaha mendapatkan kerjasama komuniti dalam memerangi penyalahgunaan dadah. Jentera utama bagi CEP ialah Pengupayaan Komuniti - Strategi Pencegahan Penyalahgunaan Dadah (Community Battery - Drug Abuse Prevention Strategies, COMBAT-DAPS), iaitu produk kerjasama antara Universiti Sains Islam Malaysia, Pusat bagi Penyelidikan



Penyalahgunaan Dadah Asia (Asian Centre for Research on Drug Abuse, ACREDA) dan AADK.

Matlamat COMBAT-DAPS adalah untuk menyampaikan maklumat tentang pencegahan penyalahgunaan dadah kepada komuniti. Maklumat yang dikongsi dengan peserta semasa sesi ini termasuklah jenis dadah dan kesannya, undang-undang dan dasar di Malaysia yang berkaitan dengan penggunaan dan penyalahgunaan dadah di samping status penagihan dadah di Malaysia.

“Kaedah lama iaitu penangkapan, pemenjaraan dan pemulihan secara ‘cold turkey’ digantikan dengan sistem berteraskan kesihatan.”

Berpandukan amalan COMBAT-DAPS, satu Rangka Kerja Peluasan Pemerksaan telah dibangunkan dan dilaksanakan di beberapa daerah lagi. Rangka Kerja Peluasan Pemerksaan menumpukan penyertaan komuniti secara aktif pada peringkat daerah di setiap negeri, pembangunan keupayaan untuk pemimpin komuniti dari segi pengurusan program serta pembangunan persekitaran sokongan. Proses mewujudkan persekitaran sokongan melibatkan lapan rakan kongsi strategik (agensi-agensi Kerajaan dan persatuan) dan enam rakan pintar (NGO) untuk menyertai program dan aktiviti.

Rakan kongsi strategik ini terdiri daripada Kementerian Belia dan Sukan, PDRM, Pertubuhan Sukarelawan Rakyat (RELA), Jabatan Kemajuan Islam Malaysia (JAKIM), Jabatan Kebajikan Masyarakat, Jabatan Pendidikan dan Jabatan Perpaduan Negara dan Integrasi Nasional. Rakan kongsi pintar terdiri daripada PEMADAM, Pengasih Malaysia, perikatan yang terdiri daripada persatuan belia seperti Belia 4B, entiti persendirian, SKUAD 1Malaysia, serta pelbagai NGO dan persatuan lain.

Sasaran bagi tahun 2017 adalah untuk melancarkan Program Pemerksaan Komuniti di 50 kawasan berisiko tinggi daripada 178 kawasan yang telah dikenal pasti. Sehingga 2017, AADK telah melaksanakan program ini di 64 kawasan berisiko tinggi, melebihi sasarannya sebanyak 28%.

Inisiatif untuk menakrifkan semula kesalahan jenayah terhadap penagih dadah juga sedang dilaksanakan.

Kaedah lama iaitu penangkapan, pemenjaraan dan pemulihan secara ‘cold turkey’ digantikan dengan sistem berteraskan kesihatan yang menekankan penglibatan komuniti dan penyediaan rawatan pemulihan dari mula hingga akhir. Susulan kejayaan projek rintis di daerah Besut, Terengganu pada tahun 2016, yang menyaksikan 54% daripada sukarelawan yang mendaftar untuk rawatan berjaya mengekalkan kehidupan bebas dadah, AADK kini diperkasakan dengan penguatkuasaan di bawah Seksyen 3(1) Akta Penyalahgunaan Dadah (Rawatan dan Pemulihan) 1983 (Akta 283) di 106 daerah di seluruh negara. Ini membolehkan pegawai AADK menahan mana-mana individu yang disyaki sebagai penagih dadah. Mereka boleh ditahan untuk tempoh tidak melebihi 24 jam di lokasi tertentu untuk menjalani ujian air kencing.

Undang-undang ini membolehkan AADK bertindak segera untuk mengekang penyalahgunaan dadah. Antara operasi yang dijalankan di bawah undang-undang ini ialah Ops Cegah, Ops Bersepadu dan Ops Sepayang melalui kerjasama antara AADK dengan PDRM. Pada tahun 2017, AADK telah menjalankan 5,431 operasi dan 40,800 ujian air kencing. Daripada semua ujian tersebut, 21,941 (54%) daripada mereka yang ditahan didapati positif dadah.

MENCIPTA MASA DEPAN YANG LEBIH CERAH BAGI BANDUAN

Sejak pelancaran NTP, inisiatif berkaitan dengan penjara telah tertumpu kepada peningkatan sokongan kepada banduan selepas dibebaskan untuk memulakan kehidupan baharu. Sehubungan ini, Jabatan Penjara Malaysia telah mengambil langkah proaktif dan pragmatik untuk pemulihan bekas banduan melalui Program Pembangunan Insan.

Program pemulihan telah dibangunkan untuk banduan selepas mengambil kira kriteria seperti kategori jenayah, tahap pendidikan, umur dan tahap amalan agama dalam kalangan banduan untuk memberikan struktur, rasa kekitaan dan matlamat kepada banduan. Penerapan pendekatan pemulihan ini dilakukan berdasarkan falsafah “bakal banduan akan pulih dengan bantuan dan bimbingan bersepadu”.

Proses pemilihan bagi bakal peserta program latihan kemahiran ini dilaksanakan selepas menyempurnakan dua fasa pemulihan berstruktur; iaitu fasa orientasi (fasa

pertama) yang mengembalikan kesihatan fizikal dan mental yang optimum kepada banduan, membentuk serta membina disiplin mereka dan membantu banduan menyesuaikan diri dengan kehidupan di penjara; diikuti dengan fasa pembangunan sikap (fasa kedua) yang memupuk tingkah laku yang baik melalui ilmu jasmani dan rohani.



Penjara Wanita Kajang, Selangor.

Banduan kemudiannya akan menyertai program latihan kemahiran masing-masing untuk melengkapkan diri dengan kemahiran bagi meningkatkan kebolehan untuk mendapatkan pekerjaan dan mendaftarkan mereka dalam skim penempatan pekerjaan yang akan memastikan mereka dapat menyara diri sendiri selepas dibebaskan.

Pada tahun ini, Jabatan Penjara meneruskan program latihan kemahiran bertauliah, iaitu pensijilan kemahiran teknikal dan vokasional di bawah Sistem Latihan Dual Nasional (SLDN) dengan kerjasama Lembaga Pembangunan Industri Pembinaan (Construction Industry Development Board, CIDB). Program ini diperakui oleh Jabatan Pembangunan Kemahiran dan Jabatan Tenaga Manusia, Kementerian Sumber Manusia serta Kementerian Kerja Raya. Program latihan ini direka khusus untuk banduan rakyat Malaysia dalam fasa ketiga Program Pembangunan Insan, yang mempersiapkan banduan untuk kembali semula ke pangkuan masyarakat.

Program SLDN menawarkan kursus latihan yang diperakui oleh Jabatan Pembangunan Kemahiran. Latihan dan pensijilan dijalankan secara dalaman (in-house), dengan 47 kursus berasaskan Standard Kemahiran Pekerjaan Kebangsaan (National Occupational Skills Standard, NOSS) ditawarkan di 42 institusi penjara dan pusat pemulihan komuniti di seluruh negara. Latihan ini diselia oleh pegawai daripada Jabatan Pembangunan Kemahiran yang bertindak sebagai jurulatih dan pengajar, penyelaras SLDN dan Pegawai Pensijilan Luar. Antara

kursus yang ditawarkan dalam program ini termasuklah kursus dalam bidang penyediaan makanan dan pembuatan kek, jahitan, pembikinan, pembuatan perabot, ukir kayu, landskap asas dan kerja pembinaan, kejuruteraan mekanikal, servis kenderaan, seni tembikar, kerja paip, kerja logam dan pertanian.

Program CIDB adalah program berasaskan latihan dan peperiksaan yang dinilai oleh pengajar daripada Akademi Binaan Malaysia. CIDB menawarkan empat kursus berkaitan dengan pembinaan: pemasangan siling tetap, perdagangan kargo basah, pembinaan landskap dan pemasangan pendawaian untuk bangunan.

Seiring dengan itu, kursus jangka pendek (Sijil Asas Kemahiran Jangka Pendek) ditawarkan kepada banduan yang menerima hukuman penjara singkat atau mereka yang tidak layak untuk menyertai dua jenis latihan kemahiran yang lain. Melalui kursus jangka pendek ini, banduan dapat mempelajari kemahiran vokasional yang akan menjadi asas untuk membina kerjaya selepas tamat menjalani hukuman penjara. Antara kursus ini termasuklah pembinaan asas, pembaikan dan penyelenggaraan penyaman udara, pembuatan jeruk dan sos, pembuatan kuih tradisional, penanaman cendawan, penternakan lebah, penanaman sayuran, penyediaan tapak untuk penanaman anak benih dan sayuran, refleksologi dan menggunting rambut.

“Banduan dilengkapkan dengan kemahiran bagi memastikan mereka dapat menyara diri sendiri selepas dibebaskan.”

Sehingga tahun 2017, 2,854 banduan telah menyertai program latihan kemahiran berbanding dengan 2,265 pada tahun 2016. Daripada 2,854 peserta, 2,073 menyertai program di bawah SLDN, 141 di bawah CIDB manakala 640 di bawah Sijil Asas Kemahiran Jangka Pendek.

Pertimbangan belanjawan menjadi cabaran bagi Jabatan Pembangunan Kemahiran memandangkan pembangunan infrastruktur dan pengagihan sumber untuk menyediakan latihan memerlukan peruntukan belanjawan daripada Kerajaan.

Untuk meningkatkan proses pemulihan, Jabatan Penjara akan mengukuhkan program pemulihan dan peningkatan sokongan selepas pembebasan, dengan menambahkan bilangan kakitangan dan agensi Kerajaan yang terlibat dalam proses menghantar pulang banduan pendatang asing.



Jabatan Penjara turut mewujudkan prosedur operasi piawai (Standard Operating Procedure, SOP) menurut Akta Kehadiran Wajib Pesalah-Pesalah 1954 yang membolehkan Jabatan memindahkan banduan yang layak ke pusat pemulihan, dan mengelakkan pemenjaraan serta merta bagi pesalah yang terbabit dengan kesalahan berkaitan dengan dadah atau kesalahan kecil. Akta ini membenarkan pesalah bagi kesalahan kecil menjalani hukuman di luar penjara melalui hukuman komuniti di bawah seliaan Jabatan Penjara jika pesalah merupakan pesalah kali pertama atau telah dikenakan hukuman jenayah yang kurang serius. Hukuman komuniti bagi pemulihan dipilih untuk mencegah ulang kesalahan dan ulang laku jenayah. Inisiatif ini sejajar dengan usaha Kerajaan untuk melaksanakan hukuman alternatif dan proses jenayah yang lebih berkesan dan teratur.

“AKSEM telah melaksanakan 145.8% inisiatif kejayaan pantas di sempadan Selatan Thailand.”

Selain itu, Makmal Penjara yang diadakan pada 2017 telah mencadangkan pindaan kepada Kanun Prosedur Jenayah, Akta Kehadiran Wajib 1954 dan Akta-akta berkaitan dengan dadah bagi penagih untuk mendapatkan rawatan di luar penjara menjelang tahun 2020.

Jabatan Penjara turut menyasarkan peningkatan proses pemulihan untuk mencapai kadar ulang laku jenayah 5% daripada kadar semasa 8.9% menjelang tahun 2020. Kadar ulang laku jenayah semasa telah menyebabkan kesesakan di penjara, dengan purata kadar kapasiti berlebihan sebanyak 17%. Menjelang tahun 2020, Jabatan Penjara menyasarkan pengurangan kapasiti berlebihan di penjara dengan mengalihkan dua per tiga daripada banduan yang layak dengan cara mewajibkan banduan yang layak untuk menjalani program pemulihan yang berkesan.

MEMASTIKAN KESELAMATAN SEMPADAN

Makmal Keselamatan Sempadan yang melibatkan 16 agensi Kerajaan telah diadakan pada tahun 2016 untuk membangunkan rangka kerja mesra bagi hubungan sempadan dan program untuk memperkukuh

sempadan darat Malaysia (terutamanya sempadan dengan Thailand) daripada penerobosan sempadan dan penyeludupan haram. Program ini merangkumi 21 inisiatif khusus, termasuk pembentukan Agensi Kawalan Sempadan (AKSEM) pada tahun 2017 untuk memacu keseluruhan program.

21 inisiatif dikategorikan di bawah enam bidang fokus yang berikut:

- Memperkemas Proses dan Dasar Sempadan;
- Mengubah Cara Berfikir dan Budaya Komuniti Sempadan;
- Menambah Baik Infrastruktur Fizikal, Modal Insan dan Teknologi;
- Memperkasakan Keupayaan Kakitangan di Sempadan;
- Memupuk Kerjasama yang Lebih Erat Antara Agensi; dan
- Menerapkan Budaya yang Menekankan Integriti dan Maruah.

Sehingga 2017, AKSEM telah melaksanakan 145.8% daripada enam inisiatif kejayaan pantas di beberapa Kompleks Imigresen, Kastam, Kuarantin dan Keselamatan (Immigration, Customs, and Quarantine Security Complexes, ICQS) di sempadan Kedah dan Kelantan dengan Selatan Thailand. Kejayaan pantas yang telah dicapai termasuklah latihan pentauliah dan pembangunan kakitangan keselamatan sempadan, pengenalan dan pelaksanaan ketekunan wajar dan ujian integriti, sesi bina pasukan suku tahunan, penguatkuasaan lebih tegas di komuniti sempadan, pusingan kerja setiap enam hingga 12 bulan di sempadan dan program kesedaran sempadan. Kejayaan ini dapat dicapai berikutan pelulusan Akta Agensi Kawalan Sempadan Malaysia (AKSEM) 2017 di samping pindaan Arahan Majlis Keselamatan Negara No. 15 yang menguatkuasakan rangka kerja baharu di sempadan Malaysia-Thailand, Sarawak-Kalimantan dan Sabah-Kalimantan.

Selain AKSEM, agensi utama yang terlibat dalam keselamatan sempadan termasuklah PDRM, Pasukan Gerakan Am, Jabatan Kastam, Jabatan Imigresen dan AADK. Berdasarkan Strategi Lautan Biru Kebangsaan (National Blue Ocean Strategy, NBOS), RELA mungkin akan turut terlibat terutamanya di Sarawak yang mempunyai banyak laluan haram untuk merentasi sempadan Kalimantan yang panjang dan mudah ditembusi. Selain itu, RELA telah menyediakan tenaga manusia tambahan kepada polis dan CIQ (Kastam, Imigresen dan Kuarantin) untuk mengawal pintu masuk sempadan.

Pendekatan Holistik PDRM dalam Memerangi Jenayah

Polis Diraja Malaysia (PDRM) layak diberi pengiktirafan berikutan usaha mereka dalam mendekati masyarakat melalui pelbagai program penglibatan, menurut Choo Lub Khung, Setiausaha Agung Persatuan Penduduk BK5 Bandar Kinrara Puchong. “Orang ramai kini lebih menyedari bahawa pegawai-pegawai PDRM berkerja siang dan malam di pusat-pusat kawalan bagi memastikan keselamatan mereka terjaga,” ujar Choo. Beliau percaya bahawa dengan peningkatan kesedaran ini, lebih ramai penduduk yang bersedia untuk menjadi mata dan telinga PDRM.

Ini satu petanda yang baik kerana Choo berpendapat bahawa pembanterasannya memerlukan kerjasama semua pihak – individu, masyarakat, syarikat-syarikat, badan bukan kerajaan dan semua agensi Kerajaan. Menurut Choo, Penunjuk Persepsi Jenayah (Perception of Crime Indicator, PCI) dan Indeks Penglibatan Komuniti (Community Engagement Index, CEI) yang baru dibangunkan merupakan penanda aras bagi persepsi rakyat terhadap jenayah. Namun, keputusan indeks-indeks tersebut menunjukkan bahawa masih banyak penambahbaikan yang perlu dilakukan oleh PDRM.

“Ketakutan terhadap terjadinya jenayah dan kejadian jenayah yang sebenarnya berlaku merupakan dua isu yang berasingan. Rakyat merasakan seolah-olah kadar jenayah

semakin meningkat disebabkan berita yang diterima melalui saluran media tanpa usul periksa fakta sebenar. Berita tersebut kemudian disebarkan secara meluas kepada rakan-rakan melalui media sosial,” kata beliau lagi.

Walau bagaimanapun, Choo mengakui PDRM telah meletakkan usaha dalam transformasi menjadi badan yang lebih berorientasikan masyarakat. “PDRM kini lebih prihatin terhadap masyarakat dan telah berubah menjadi organisasi yang berteraskan perkhidmatan dalam memerangi jenayah dan memastikan keselamatan masyarakat,” kata Choo.

Namun begitu, masih banyak penambahbaikan yang boleh dilakukan dalam hal ini. “Transformasi ini harus dilaksanakan secara menyeluruh. PDRM harus lebih proaktif dalam menggunakan media-media baharu bagi berkongsi kaedah pencegahan jenayah kepada mereka yang giat dalam pencegahan jenayah di kalangan masyarakat. Melalui mereka ini, maklumat-maklumat ini akan disampaikan kepada rakyat dengan lebih cepat,” tambah beliau.

Choo berkata, kedua-dua PCI dan CEI memberikan maklumat penting tentang apa yang dirasakan oleh masyarakat dan PDRM boleh menggunakan maklumat ini dalam usaha menjadikan Malaysia sebuah negara yang lebih selamat. “Masyarakat berhak untuk berasa selamat, kerana persepsi terhadap keselamatan ini memberi kesan kepada kualiti kehidupan kami.”



Persatuan penduduk BK5 Bandar Kinrara Puchong bersama Polis DiRaja Malaysia (PDRM).



TINJAUAN MASA HADAPAN ▶▶

NKRA Mengurangkan Jenayah telah berjaya meraih pencapaian besar dalam menurunkan kadar jenayah indeks Malaysia sepanjang tempoh pelaksanaan NTP. Perubahan yang besar berjaya dicapai melalui usaha bersepadu dalam seluruh sistem keadilan jenayah. Untuk mengekalkan kemajuan ini, orang awam serta agensi-agensi di bawah Kementerian Dalam Negeri seperti PDRM, AADK dan Jabatan Penjara mesti memainkan peranan mereka dalam usaha membanteras dan mencegah jenayah, pengesanan dan penahanan pesalah, jaminan dan reman, penyediaan kes, penempatan semula dan pemulihan.

NKRA ini akan terus memperkukuh sempadan Malaysia untuk menyekat aktiviti penyeludupan haram. Selain itu, dalam usaha memastikan keselamatan rakyat, PDRM akan meneruskan inisiatif kepolisan berorientasikan komuniti yang menumpukan usaha menjalin hubungan dan kerjasama dengan komuniti. Sikap proaktif dalam menangani kebimbangan berkaitan dengan keselamatan orang awam akan diteruskan untuk mengukuhkan kemampanan dalam berdepan suasana urbanisasi yang semakin meluas dan penghijrahan antara negeri di negara ini.

Untuk memastikan pengurangan jenayah di negara ini tahun demi tahun berdasarkan populasi, semua rakyat Malaysia digesa mengambil bahagian. Orang awam mesti memainkan peranan dengan meningkatkan kewaspadaan dan memantau aktiviti yang berlaku di kejiranan mereka. Selain itu, hubungan dua hala yang erat antara orang awam dengan polis akan mengukuhkan usaha membanteras jenayah.
